

25-02-2025

खबरां प्रोमिला जम्वाल कोला

- प्रधानमंत्री नरेंद्र मोदी होरें आखेआ जे असम हून इक स्टार्ट अप हब दे तौर पर विकसित होआ करदा ऐ ते तौलें गै पूर्वोत्तर दा इक उत्पादन केंद्र बनी जाग।
- राष्ट्रपति द्रौपदी मुर्मू होरें आखेआ जे सेहत सहूलतें दे विकेंद्रीकरण कन्नै बड्डे सेहत संस्थानें पर दबाऽ घटोग।
- दिल्ली विधानसभा च उपराज्यपाल हुंदे अभिभाषण दौरान डंड रौली पाने करी आम आदमी पार्टी दे 21एं विधायकें गी मौजूदा सत्र दिएं 3 बैठकें लेई मुअत्तल करी दित्ता गेआ ऐ।
- एक राष्ट्र एक चुनां पर संसद दी संयुक्त समिति दी बैठक अज्ज संसद भवन च लग्गी।
- रक्षा मंत्री होरें भारती तटरक्षक बल दे कर्मिं गी बहादुरी ते सेवा मेडल प्रदान कीते।
- मर्दे दी आई.सी.सी चैंपियन्स ट्रॉफी च ग्रुप-बी तैहत रावलपिंडी च आस्ट्रेलिया ते दक्खन अफ्रीका बश्कार खेड्डेआ जा'रदा मैच लगातार पवारदी बरखा करी रद्द करी दित्ता गेआ।

<><><><><><>

PM Asam Yatra

प्रधानमंत्री नरेंद्र मोदी होरें गुवाहाटी च एडवांटेज असम दे दूऐ संस्करण च निवेश ते बुनियादी ढांचा शिखर सम्मेलन गी संबोधित करदे होई आखेआ जे असम, दक्षिण पूर्व एशिया ते भारत दे प्रवेश द्वार ते असीमित संभावनाएं दा केंद्र बने दा ऐ। राजनयिकें, प्रमुख उद्योगपतियें, विदेशी प्रतिनिधियें दी विशाल सभा गी संबोधित करदे होई प्रधानमंत्री होरें आखेआ जे असम पूर्वी भारत दा इक विनिर्माण केंद्र बनौग। उने इस रणनीतिक स्थिति दा लाहू ठोआने दा आग्रह उद्योगपतियें सोयां कीता। प्रधानमंत्री होरें आखेआ जे उनदी सरकार संपर्क ते अवसंरचना च सुधार करने पर कम्म करा र दी

ऐ। उनदी सरकार इस क्षेत्र च मुकामी आपूर्ति श्रृंखला गी मजबूत करने पर बी कम्म करा र दी ऐ। श्री मोदी होरें आक्खेआ जे भारत घट्ट लागत दी विनिर्माण प्रक्रिया आस्तै मिशन मोड पर कम्म करा र दा ऐ। प्रधानमंत्री मोदी होरें आक्खेआ जे असम च कानून ते व्यवस्था दी स्थिति च पिछले 10 बरें च सुधार होआ ऐ। केंद्र ते राज्य सरकारें नै केई शांति समझौतें पर दस्खत कीते न। प्रधानमंत्री होरें आक्खेआ जे असम सरकार नै कारोबार गी सखल्ला बनाने आस्तै इ साजगार माहौल बनाया ऐ। असम सरकार नै उद्योगें आस्तै श्रेष्ठ नीतियां तैयार कीतियां न। 2030 तक डेढ़ अरब दी अर्थव्यवस्था बनने दा लक्ष्य तय कीता गेआ ऐ। श्री मोदी होरें आक्खेआ जे केंद्र सरकार राज्य सरकार गी लगातार समर्थन देआ र दी ऐ। असम भारत दे आर्थिक विकास च इक महत्वपूर्ण भूमिका निभाई सकदा ऐ। एडवांटेज असम शिखर सम्मेलन दा दूआ संस्करण असम ते पूर्वोत्तर क्षेत्र आस्तै इक नमी शुरूआत ऐ। उद्घाटन सत्र मगरा प्रधानमंत्री नमी दिल्ली रवाना होई गए।

<><><><><><>

Ashwani-Vaishnav

रेल मंत्री अश्विनी वैष्णव होरें अज्ज गोहाटी च आक्खेआ जे प्रधानमंत्री श्री नरेंद्र मोदी इस प्रांतै दे विकास लेई जमीनी सतह पर कम्म करा रदे न, इस लेई असम भारत दा विकास इंजन बनोग। एडवांटेज असम निवेश ते ढांचागत शिखर सम्मेलन गी संबोधित करदे होई श्री वैष्णव होरें आक्खेआ जे जागीरोड दा सेमीकंडक्टर संयंत्र असम गी सेमीकंडक्टर दा केंद्र बनाग। उनें दस्सेआ जे गुवाहाटी च रेलवे स्टेशन दी जिमी पर भलेआं अज्जै-कल्लै आहला आई.टी हब बनाया जाग।

<><><><><><>

President

राष्ट्रपति द्रौपदी मुर्मु नै अज्ज देश च सेहत स्थानें च बेहतर चिकित्सा सुविधाएं दे विकेंद्रीकरण ते मते शोध पर बल दिता। राष्ट्रपति बिहार च पटना दे बापू सभागार च पटना मेडिकल कॉलेज ते अस्पताल-पी.एम.सी.एच. दे शताब्दी समारोह गी संबोधित करा र दियां हियां। राष्ट्रपति होरें आक्खेआ जे

लौहके शैहरें च चिकित्सा सुविधा उपलब्ध होंडन तां इसदे कन्ने बड़्डे संस्थानें पर दबाव घट्ट होग। राश्ट्रपति द्रौपदी मुर्मू होर अज्जै थमां त्रै राज्यें दे 5एं दिनें दे दोरे पर न। अपने दौरे दरान राश्ट्रपति होर बिहार, मध्यप्रदेश ते गुजरात दा दौरा करगंन जेहदा 1 मार्च गी संपन्न होई जाग। कल राश्ट्रपति होर मध्यप्रदेश दे छुत्तपुर च बागेश्वर जन सेवा समिति आस्सेआ आयोजित सामूहिक ब्याह समारोह च बी शिरकत करगंन। कल उंदा गुजरात च स्टच्यू ऑफ यूनिटी पर श्रद्धांजलि भेंट करने ते केवड़ियां च नर्मदा आरती च शामिल होने दा बी कार्यक्रम ऐ। वीरवारें राश्ट्रपति होर केवड़ियां च एकता कौशल विकास केन्द्र दा दौरा लांगन ते अहमदाबाद च राश्ट्रीय डिजाइन संस्थान दे 44में दीक्षांत समारोह च शिरकत करगंन। एहदे परैंत शुक्रवा ओहू गांधी नगर च राश्ट्रीय फोरेंसिक साईंस यूनिवर्सिटी दे त्रीए दीक्षांत समारोह च शिरकत करगंन।

<><><><><><>

New Delhi Assembly Suspended

दिल्ली विधानसभा च अज्ज आम आदमी पार्टी दे 12 विधायकें गी उनदे अभद्र व्यवहार करी दिनभर लेई निलंबित करी दिता गया। इनदे च विपक्ष दी नेता आतिशी ते आप दे वरिष्ठ नेता गोपाल राय भी शामिल हे। उपराज्यपाल वी के सक्सेना बडले जिसलै सदन गी संबोधित कर र दे हे तां विपक्षी सदस्यें दिल्ली दी मुख्यमंत्री रेखा गुप्ता हुन्दे कक्ष सोयां डॉक्टर बी. आर. आम्बेडकर ते भगत सिंह हुन्दी तस्वीर कथित तौर पर हटाए जाने गी लेईऐ नारेबाजी शुरू करी दिती। सत्तारूढ भारतीय जनता पार्टी नै पैहले गै इस आरोप दा खंडन कीता ऐ। हंगामे दे चलदे स्पीकर विजेन्द्र गुप्ता होरें बार-बार सदन च व्यवस्था बनाई रखने दा आग्रह कीता। पर विपक्षी सदस्यें विरोध जारी रखेआ। मगरा अध्यक्ष होरें अभद्र व्यवहार करने ते प्रदर्शन करा र दे आम आदमी पार्टी दे विधायकें गी सदन सोया निलंबित करने दी घोषणा कीती। अपने संबोधन च उपराज्यपाल होरें आक्खेआ जे दिल्ली सरकार नीति मार्गदर्शन आस्तै विकसित दिल्ली संकल्प पत्र गी दस्तावेज दे तौर पर अपनाग ते लोकें सोयां कीते गेदे सारे वादें गी पूरा करौग। साहडे संवाददाता नै दस्सेआ ऐ जे आप विधायकें अपने निलंबन कन्ने संबंधित फैसले दे विरोध च विधानसभा दे बाहर विरोध प्रदर्शन कीता।

<><><><><><>

JPC-One Nation

अज्ज संसदन भवन च इक राश्ट्र इक चुनाऽ पर संसद दी संयुक्त समिति दी बैठक लग्गी। बैठक दौरान समिति नै कनूनी विशेषज्ञें कन्नै गल्लबात कीती। 39एं सदस्यें आहली इस समिति च लोकसभा दे 27 ते राज्यसभा दे 12 मिम्बर शामिल न।

<><><><><><>

Defence Minister

रक्षा मंत्री राजनाथ सिंह होरें अज्ज नमीं दिल्ली च आयोजित अलंकरण समारोह च भारती तटरक्षक बल दे कर्मिं गी बहादुरी, वशिष्ट सेवा ते सराहनेजाग सेव लेई 32 तगमे प्रदान कीते। इंदे च विशिष्ट सेवा लेई 6 राश्ट्रपति तटरक्षक तगमे, बहादुरी लेई 15 तगमे शामिल न। श्री सिंह होरें आखेआ जे सरकार भारती तटरक्षक बल गी बेहतर बनाने लेई बचनबद्ध ऐ। उनें आखेआ जे तटरक्षक बल गी 2025-26 आहले माली बरे लेई 9 जहार 676 करोड़ रपे बक्ख रक्खे गे'न जेड़ा पिछले बरे शा 26 अशारिया 6 प्रतिशत मता ऐ। उनें आखेआ जे भारती कोस्टगार्ड फोर्स दुनिया दी सब्भनें शा कुशल, समुंद्री सेनाएं चा इक्क ऐ। रक्षा मंत्री होरें आखेआ जे इक पाससै भारती तटरक्षक बल गी पारम्परिक खतरें दा सामना करना पौंदा ऐ ते दुई बक्खी नमें खतरे बी उभरा'रदे न। इस मौके पर रक्षा राज्यमंत्री, संजय सेठ, रक्षा सचिव राजेश कुमार सिंह ते भारती तटरक्षक बल दे महानिदेशक परमेश शिवमणि समेत दुए बड़े अफसर बी मौजूद हे।

<><><><><><>

DGMO-Manipur

थल सेना दे सैन्य अभियान महानिदेशक लेफ्टिनेंट जनरल राजीव घई होरें भारत-म्यंमार बन्ने पर स्थिति दी जानकारी लेने लेई मणिपुर दा दौरा लाया। अज्ज सम्पन्न होए दे 2 दिनें दे दौरे दौरान उनें भारती सेना दिएं तैयारिं ते राज्य च मौजूदा सुरक्षा स्थिति दी समीक्षा कीती। लेफ्टिनेंट जनरल

राजीव घई होरें मणिपुर दे राज्यपाल अजय कुमार भल्ला ते दुए अधिकारिणं कन्नै बी मुलाकात कीती।
उनें राज्य च मौजूदा सुरखा स्थिति गी सामान्य बनाने ते भारत-म्यंमार बन्ने पर बुनियादी सुरक्षा ढांचे
गी मजबूत करने दी जरूरत पर चर्चा कीती।

<><><><><><>

COAS-France

सेनाध्यक्ष जनरल उपेंद्र द्विवेदी होरें फ्रांस दे इसलै चला रदे अपने दौरे दौरान फ्रांसिकी सेनाध्यक्ष
जनरल पियरे सिशिल हुंदे कन्नै मलाटी लाई। इस मीटिंग दौरान जनरल द्विवेदी होरें दक्खिया रक्षा
सहयोग, दौनें देसें दिएं सेनाएं मझाटै तगड़े सरबन्धें ते वैश्विक शांति ते सुरक्षा लेई सांझी प्रतिबद्धता
जनेह मुद्दे पर विचार-बटांदरा कीता। उनें लेस Invalides च गार्ड ऑफ ऑनर दा बी निरीक्षण कीता।

<><><><><><>

BJP-CAG-Report

भारती जनता पार्टी नै अज्ज पिछली आम आदमी पार्टी दी सरकार पर कैग रिपोर्ट पेश करने च चिर
लाने दा दोष लाया। नमीं दिल्ली च मीडिया आहलें कन्नै गल्ल करदे होई पार्टी दे वरिष्ठ नेता बैजयंत
जय पांडा होरें आखेआ जे भारती जनता पार्टी शैहरे चा भ्रष्टाचार गी मुंडा मकाने लेई बचनें बज्झी दी
ऐ ते उन्नै विधानसभा च कैग रिपोर्ट पेश करियै दिल्ली दे लोकें दे प्रति अपना संवैधानिक फर्ज ते धैया
पूरा कीता ऐ।

<><><><><><>

ICC-Mens Championsip

आस्ट्रेलिया ते दक्खन अफ्रीका बश्कार आई.सी.सी पैपियन्स ट्रॉफी दा 7मां मैच रद्द होई गेआ ऐ।
रावलपिंडी च लगातार बरखा पौने करी दौनें टीमें बश्कार ग्रुप-बी दे इस मुकाबले गी रद्द करने दा

फैसला कीता गेआ। दौनें टीमें गी 1-1 पाइंट थोआ। ग्रुप च दक्खन अफ्रीका पैहले ते आस्ट्रेलिया दुई थाहरै पर ऐ।

<><><><><><>

Cricket

महिला प्रीमियर लीग च अज्ज बेंगलुरु दे एम. चिन्नास्वामी स्टेडियम च गुजरात जायंट्स दा मुकाबला दिल्ली कैपिटल्स कन्नै होग। मैच संझा साड्डे 7 बजे थमां खेड्डेया जाग। दिल्ली कैपिटलस नै हूनै तगर 4 मैच खेड्डे देन जिंदे चा उन्नै 2 जित्ते देन ते 2 हारे हे। दुए पाससै गुजरात जायंट्स इसलै 3 मैचें चा छड्डा 1 मैच जित्तियै अंक तालिका च सम्भनें शा हेठले पायदान पर ऐ।

<><><><><><>

Goyal

केंद्री वाणिज्य ते उद्योग मंत्री पीयूष गोयल होरें आखेआ ऐ जे भारत ते ब्रिटेन बश्कार मुक्त बपार समझौता दौनें देशें मझाटे सरबंघें च इक महत्वै आहली उपलब्धि साबत होग। श्री गोयल होरें अज्ज नमीं दिल्ली च ब्रिटेन दे बपार ते वाणिज्य मंत्री जोनाथन रेनाल्ड्स हुंदे नेतृत्व च इक प्रतिनिधिमंडल कन्नै बैठक लाई। बैठक दौरान दौनें पक्खें, निरपक्ख, दपक्ख्या लाभ पुजाने आहले ते संतुलित मुक्त बपार समझौते आहली भेठा हुनै तगर होई दी प्रगति दा जायजा लैता।

<><><><><><>

Chhatisgarh

छत्तीसगढ़ दे बस्तर इलाके दे बीजापुर जिले च अज्ज 9वें माओवादिएं आत्मसमर्पण कीता। इन्दे चा 4 पर 23 लक्ख रुपें दा ईनाम घोषित हा। इनें माओवादिएं केंद्रीय रिजर्व पोलीस बल ते पोलीस दे बड्डे अधिकारिएं सामनै आत्मसमर्पण कीता।

<><><><><><>

Bangladesh

बांग्लादेश दे छात्र नेता नाहिद इस्लाम होरें अंतरिम सरकार च सूचना ते प्रसारण सलाहकार दे ओहदे थमां इस्तीफा देई दित्ता ऐ। उन्नै अपना इस्तीफा मुख सलाहकार डॉ. मुहम्मद युनुस होरें गी सौंपेआ। एहदे शा पैहलें कल फर्को-फर्की दे विरोधे च चला रदे छात्र आंदोलन दे जातीय नागरिक समिति नै घोषणा कीती जे 28 फरवरी गी ढाका च इक नमीं सियासी पार्टी दा गठन कीता जाग। श्री नाहिद दे इस पार्टी दा संयोजक बनने दी संभावना ऐ।

<><><><><><>

Sajjan-Saja

दिल्ली दी इक अदालत नै अज्ज 1984 दे सिख विरोधी दंगें कन्ने जुड़ी दी हत्या दे इक मामले च साबका कांग्रेस सांसद सज्जन कुमार होरें गी आजीवन कारावास दी सजा सुनाई। विशेष न्यायाधीश कावेरी बावेजा होरें इक नवंबर 1984 गी जसवंत सिंह ते उनदे पुत्र बेटे तरुणदीप सिंह दी हत्या दे मामले च एह फैसला सुनाया। अभियोजन पक्ष ते पीड़ितें दे परोआर नै बद्दोबद्द सजा दी मंग कीती ही। सज्जन कुमार पैहले सोयां गै दंगें कन्ने संबंधित इक होर हत्या मामले च आजीवन कारावास दी सजा कट्टा र'दे ना ते उनदी अपील सर्वोच्च न्यायालय च लंबित ऐ।

<><><><><><>

Herath

कश्मीरी पंडित समुदाय आसेआ महाशिवरात्रि दे मौके पर मनाए जाने आह्ला ध्यार हेरथ अज्ज पूरे-जोश ते जज्बे कन्नै मनाया जा'रदा ऐ। भक्ति ते प्रार्थना दा एहू समां भगवान शिव गी समर्पित ऐ। एहू शुभ मौका जम्मू-कश्मीर दे लोकें आस्तै डूंगा सांस्कृतिक ते आध्यात्मिक महत्व रखदा ऐ। इस मौके पर मुखमंत्री उमर अब्दुल्ला, उपमुखमंत्री सुरेंद्र चौधरी, सेहत मंत्री सकीना इत्तू ते राई-बाई आहले मैहकमे दे मंत्री जावेद अहमद डार होरें लोकें गी हार्दिक शुभकामनां दिंदे होई जोर देइयै आखेआ जे एहू ध्यार समुदायें च शांति, सद्भाव ते एकता गी बढावा देने च महत्वपूर्ण भूमिका अदा करदा ऐ।

<><><><><><>

LG-Interview

उपराज्यपाल मनोज सिन्हा होरें आखेआ जे भारत गी विकसित राश्ट्र बनाने लेई जम्मू-कश्मीर दा योगदान बाकी हिस्सें आहला लेखा गै होग। उनें प्रदेश दी सैलसफा, राई-बाई ते होरनें दुए सैक्टरें दी समर्थ गी उजागर कीता। इक निजी टी.वी चैनल गी दित्ते गेदे इंटरव्यू च उपराज्यपाल होरें उद्योगें ते निवेश गी बढ़ावा देने लेई कीते जा'रदे जत्नें गी उजागर कीता। उनें जम्मू-कश्मीर च स्टार्ट अप सरबन्धी तंत्र गी बढ़ावा देने लेई कीते जा'रदे जत्नें पर लो पाई। उनें राश्ट्र दी प्रगति च खितते दी महत्वै आहली भूमिका पर परतिए जोर दित्ता।

<><><><><><>

CM-Interview

मुख्यमंत्री उमर अब्दुल्ला होरें जोर देइये आखेआ ऐ जे सैलसफा जम्मू-कश्मीर दी अर्थ बवस्था च महत्वै आहली भूमिका निभांदा ऐ ते इत्थे धार्मिक ते बन्ने आहले सैलसफा दी खास करी जम्मू च बड़ी मती समर्थ मौजूद ऐ। उनें खित्ते दी समृद्ध सांस्कृतिक विरासत ते रणनीतिक स्थाबै महत्वै आहली थाहरें बारै गल्ल कीती। इक निजी टी.वी चैनल गी दित्ते गेदे इंटरव्यू च बोलदे होई मुख्यमंत्री होरें जम्मू-कश्मीर दे युवाएं गी बेहतर रोजगार दे मौके उपलब्ध करोआने पर जोर पाया।

<><><><><><>